

11. november 2020

UKA 2020/43/53

**Meeqqat atuarianni alloriarfinni tamani atuartut akornanni kinguaassiutitigut piumassuseqarnerup qanoq issusianut, kinguaassiutitigut nappaatinut, kissaatiginngisamik naartulertarnernut, killiliisarnissaannut kiisalu timikkut digitalitigullu innimiilliuutinut ilisimasanut tunngatillugu Naalakkersuisut misissuinissamik suliaqaqqullugit Inatsisartut aalajangiiffigisassaattut siunnersuut. Misissuinermi angusat 1. januaari 2022 nallertinnagu saqqummiunneqassapput.**

(Inatsisartuni ilaasortaq, Stine Egede, Inuit Ataqatigiit)

**Qarasaasiami inuinnaat naapittarfiini qanoq pissusilersornissamat immitsinnullu oqaloqatigiittarnitsinnut sammisalimmik paasititsiniaanermik suliaqarnissamat, aallartitsinissamullu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasortaq, Nivi Olsen, Demokraatit)

Inatsisartunut ilaasortap Stine Egedep meeqqat atuarianni qaammarsaasoqarnissaa pillugu siunnersuuteqarneranut Siumumiit imaatumik oqaaseqassaagut.

Siumumiit aallarniutigalugu oqaatigissavarput kinguaassiutitigut kanngutsaatsuliornerit suulluunniit akuersaanngilluinnaratsigit naqissusissallugu. Minnerunngitsumillu meeqqat kanngutsaatsuliorfigineqartarnerinut naaggaarluinnaratta. Taamaattumik siunnersuuteqartup Stine Egedep meeqqat atuarianni suaassutsikkut inuttut illersugaanermik ilinniusiortoqarnissaanik tunngaviumik isumaqarnera paasilluarsinnaagatsigu oqaatigissavara.

Meerartavut siunissaraavut, illersortariaqarpagullu. Taamaattumik meerartatta arlaatigut timikkut digitaliusumilluunniit kanngutsaatsuliorfigineqariatarsinnaanerminnut meeqqat atuariat atorlugu pisinnaatitaaffinnik qanorlu iliornissamik ilinniartinneqarnissaannik isuma Siumumiit isumaqatigilluinnarparput.

Siumumiit pingaartipparput peqqinnartumik atoqatigiinnerup qaammarsaataajuarnissaa. Ukiunimi kingullerni arlalippassuarni kinguaassiutitigut nappaatit naartuersinnerit aammalu kinguaassiutitigut atorerluinerit amerlavallaarujussuarput siaruarsimavallaarujussuarlutillu. Taamaattumillu siunnersuuteqartup Meeqqat atuarianni siusissukkut qaammarsaanermik aallartitsisoqarnissaa, ukioqatigiiaanut naleqqussakkamik ilusilersukkamik taperserparput.

Ilisimavarpullu Inuuneritta III-mi tamanna qitiutinneqartoq, taamaattumillu atoqatigiinnerup peqqinnartuunissaanik suliaqartut inoqarfinni suleqatigiilluartarneri Siumumiit maluginiarnikuuarput. Meeqqat atuarii, politiit, peqqinnissaqarfiit aammalu pinaveersaartitsisut suleqatigiilluarnerisigut inuusuttut akornanni peqqinnartumik atoqatigiinnerit aallunneqarsimaneranni ukiuni malitsigisaani takuneqarsinnaasarsimavoq. Taamaattumik aallussinissarput pingaartutut Siumumiit isigaarput.



Maluginiarparputtaaq Naalakkersuisut allannguutissatut siunnersuuteqartut. Taannalu ilalerparput, ataatsimiitsitaliamullu susassaqtumut suliarineqartussanngorlugu inassutigaarput.

Maanna siunnersuutip aappaanut ingerlaqqissaagut.

Inatsisartunut ilaasortap Nivi Olsenip tamat oqallittarfiini pissuserissaarnissamik ilinniartitsisalernissamik siunnersuuteqarneranut qujavugut.

Ukiuni kingullerni miserratissaanngitsumik tamat oqallittarfii assigiinngitsut inuunitsinnut inituupilussuannormata. Taamaattumillu Siumumiit isumaqarpugut pissusissamisoortoq tamat oqallittarfiini nittartakkatigoortuni oqalliseriaatsimik pissuserissaarnissamik tunngaveqartumik ilinniartitsisoqartalissapat. Tassami siornatigut allaqqissaanernik ilinniartitsisoqartarnikuvoq. Ullutsinnilu oqallittarfinni akisussaaneermik pissuserissaanissamillu ilinniarnissaq pisariaqarpoq.

Siumumiit taama oqaaseqarluta siunnersuut kultureqarnermut ataatsimiitsitaliamit aappasaaneerseqartinnani suliarineqarnissaa inassutigaarput.

Nikkulaat Jeremiassen

Siumut